

28. marts 2014

UPA 2014/144
Ruth Heilmann

Siunnersuut uunga: Atuagaateqarfiit pillugit Inatsisartut inatsisaat nr. XX af XX.XXX 2014-imeersoq.

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Nunatsinni Nunatta Atuagaateqarfia kommuninilu atuagaateqarfiit illoqarfinni nunaqarfinnilu tamani piusut tassaapput inuiaqatigiinni kalaallini innuttaasunilu atuagassaqaarnikkut qangaaniilli kulturimi atukkatigut anersaakkut ineriartornermut pingaaruteqarluinnartutut isigineqartut atorluarneqartullu.

Qangaanerusoq takusarsimavavut atuakkat atugassat neqeroorutit ullumikkornit naleqqi-unneqarsinnaangitsut ikittangaaramik taamaattorli paarlakaattuarlugit atorniarneqartu-artut, atuakkat ilaatigut nungullarluinnartarlutik atorneqartangaaramik, tassani takussutissaavoq kalaallit inuit qanoq ilisimasassaminnik piumassuseqartiginerat nutaarsiassanik aammalu anersaakkut immersorneqartuarnissaminnik.

Meerartavut atuartut, inuusuttortavut ilinniartut, utoqqartavut ilaqtariillu tamatigoortumik atugassaqaarnissaannut periarfissaqartittuassallugit inuiaqatigiinni pisussaaffeqarpugut. Soorunami ilisimasanut kulturimullu pigisanut tunngasunik atornissaminnut periarfissaqartuarnissaat qulakkeersimasariaqarmat.

Ilinniartitaaneq aammalu ilinniartitaanermik nunatsinni anguniagaqaarnitta tassuunakkut aamma annertuumik pisussaaffilerpaatigut ilisimasassanik aallernissamut pisariitsumik eqaatsumillu periarfissaqartinneqartuaqqulluta.

Taamatut pisussaaffeqarneq tamatigoortumik ingerlanneqartuaqqullugu teknikkikkut allatigullu atugassarititaasunut malinnaasariaqarnerput pisariaqarpoq. Taamaattumillu inatsisip allannguutissaanik Naalakkersuisut saqqummiussaqaarnerat pitsaasutut ullutsinnullu atukkatigut naleqqunnerusunngortitsiniarnermik imaqartoq qujassutigaarput.

Ullumikkut kikkut tamarmik assigiimmik akeqanngitsumik killeqanngitsumillu atuakkanik atorsinnaatitaanerisa ingerlatiinnarneqarnissaa Siumumit pissusissamisoortuuttipparput. Aammalu killiffiusumi ilisimasassanik assigiinngitsorpasuartigut naqitaannaanngitsunik aallerfiusinnaasut pilerneranni atuagaateqarfiit atortunik atugassiisarnerannut piumasaqaaterpassuaqarfiulersumi naapertuuttumik malittarisaaqarnissaq pinngitsoorneqarsinnaanngilaq.

Qarasaasiat atuutileruttorfianniippugut tassuunakkullu meerartavut inuusuttortattalu pikkoriffeqarnerat atorluarlugu ingerlaaseqarnermut aallarutereermatigut piumasaqaataat piginaanerilu aallavigalugit ineriartortitseqqittariaqarpugut.

Tusagassiiviit elektroniskimillu saqqummersitat aallaavigalugit paasissutissiisarfiit soorlu aamma nipilersuutininik tusarnaagassanillu imaqartut piulerneranni annertunerusumik aalajangersagaqarnissaq ilumoorpoq pisariaqarlunilu.

Atukkanik utertitsisarneq, utertinngitsooraannilu qanoq pineqaatissiinermik kinguneqartar-nissaanik maleruagassiinerit, atuagaateqarfimmiittuutisianut malittarisassiorsinnaanermik pisinnaatitaanerit aammalu Groenlandicami katersanut tassaasinnaasut: kalaallisut atuak-kat, aviisit, atuagassiat naqitat isiginnaagassiat naalaarneqarsinnaasut nunap assingi assi-lissanillu katersugaatinik ilisimatuussutsikkut atuagaateqarfimmi pigineqartut innuttaasunit takunneqarsinnaasunngorlugit qularnaariffigineqarnerat iluaraarput. Soorlu assersuutigalugu aalajangersimasumik paasissutissanik ujarlernerimi innuttaasut pissarsiniartarnerat ajornannginnerulertussaalluni.

Taamatut Siumumit saqqummiusaaq pillugu paasinninnerput oqaatigaarput, pisariaqartip-parpulli Ilinniartitaanermut, Ilageeqarnermut, Kultureqarnermut, Naligiissitaanermullu Ataatsimiititaliamut ingerlatinneqarnissaa piumasaralutigu.